

**TEKS UCAPAN  
YANG HORMAT PROFESOR DATO' DR. DAING NASIR IBRAHIM  
NAIB CANSOLOR UNIVERSITI MALAYSIA PAHANG  
SEMPENA  
MAJLIS KONVOKESYEN KE-11 UNIVERSITI MALAYSIA PAHANG  
SESI KELIMA  
PADA HARI ISNIN, 21 NOVEMBER 2016, PUKUL 8:30 PAGI  
DI DEWAN KOMPLEKS SUKAN UNIVERSITI, UMP KAMPUS GAMBANG**

---

**SALUTASI**

Yang Berbahagia Ahli-ahli Lembaga Pengarah Universiti;

Timbalan-timbalan Naib Naib Canselor dan Ahli-ahli Senat

Ketua-ketua Pusat Tanggungjawab;

Ahli-ahli akademik;

Yang Di-Pertua Majlis Perwakilan Pelajar;

Para ibu bapa yang dihormati;

Para graduan yang diraikan;

Tuan-tuan dan puan-puan yang dikasihi.

*Assalamualaikum warahmatullahi wabarakatuh,*

Salam Sejahtera dan Salam 1Malaysia.

## **KATA PEMBUKA**

1. *Alhamdulillah*, sukalah saya merafakkan setinggi-tinggi rasa syukur ke hadrat Allah Ta'ala, kerana dengan limpah rahmat dan izin-Nya, maka Sesi Kelima, Majlis Konvokesyen Ke-11 Universiti Malaysia Pahang ini telah selamat disempurnakan.
2. Justeru, saya ingin merakamkan setinggi-tinggi ucapan tahniah kepada semua 325 graduan dari Fakulti Kejuruteraan Kimia & Sumber Asli, Fakulti Kejuruteraan Awam & Sumber Alam, Fakulti Sistem Komputer & Kejuruteraan Perisian, Fakulti Kejuruteraan Elektrik & Elektronik dan Fakulti Kejuruteraan Mekanikal yang telah menerima diploma masing-masing sebentar tadi.

3. Terima kasih juga diucapkan kepada wakil graduan yang juga penerima Anugerah Emas Universiti, Saudari Wan Hamizan Wan Zainal dari Fakulti Kejuruteraan Kimia & Sumber Asli atas ucapan yang disampaikan tadi.
4. Bersempena detik bersejarah ini, saya ingin mengambil peluang untuk merakamkan setinggi-tinggi ucapan tahniah kepada para graduan yang menerima diploma masing-masing pada pagi ini. Selamat datang ke komuniti insan terpelajar;  
*welcome to the community of educated men and women.*
5. *A journey of a thousand miles begins with a single step.* Kepada graduan sekalian, ingatlah bahawa detik ini hanyalah merupakan satu permulaan. Dengan bekalan ilmu yang ada, anda sekalian akan mula belajar membina kehidupan dan memberi makna kepadanya. Jadi kepada graduan sekalian, ingatlah bahawa realiti kehidupan tidak selalunya menjanjikan banyak pilihan kepada kita.

6. Justeru, cabarannya adalah sama sahaja buat anda sekalian; sama ada anda kini menyambung pengajian di peringkat Sarjana Muda atau anda telah pun mula berkerjaya, ingatlah bahawa kebijaksanaan dan kematangan akal, tindakan dan pertimbangan merupakan kunci utama kejayaan dan keberkatan hidup.
7. Dalam soal kerjaya umpamanya, realiti ekonomi dan pasaran buruh semasa perlu ditekuni supaya anda lebih memahami bahawa tidak semestinya jenis dan sifat profesion yang diinginkan boleh terus dicapai sekelip mata. Justeru, anda harus bersedia untuk membuat keputusan dengan pilihan-pilihan yang terbatas dalam menentukan kerjaya anda.
8. Christopher Columbus pernah menyatakan bahawa *“you can never cross the ocean unless you have the courage to lose sight of the shore.”* Bersedialah untuk membiasakan diri dengan persekitaran kerja yang mencabar dengan keselesaan yang minimum. Justeru, lasakkan minda, kentalkan jiwa dan kuatkan diri anda.

9. Kejayaan anda di alam kerjaya bergantung sepenuhnya kepada merit peribadi, kualiti profesional, kecekalan, kesabaran serta keberanian anda menerima cabaran, mengurus masalah serta mencari penyelesaian.
  
10. Albert Einstein pernah menyebut bahawa, *“education is not the learning of facts, it is the training of mind to think.”* Pemikiran positif yang mendasari kekuatan sendiri merupakan perisai yang membentengi anda daripada sifat negatif seperti cepat berputus-asa, mudah mengalah dengan kesusahan, lemah semangat kerana kerja yang banyak dan berat dan suka menyalahkan orang lain atas kegagalan diri sendiri.
  
11. Malah saya percaya dengan kesedaran tersebut, keluarga anda juga akan turut memahami realiti cabaran kerjaya anda sebagai proses pembelajaran dan latihan berterusan untuk anda lebih menghargai makna kehidupan ini.

## **TANGGUNGJAWAB SEBAGAI GRADUAN DAN WARGANEGARA**

12. Saudara dan saudari, graduan sekalian,

Sesungguhnya, detik ini bukanlah milik anda semata-mata, tetapi perlu juga dikongsi dengan insan-insan yang bertanggungjawab membentuk anda sehingga terciptanya kejayaan ini.

13. Maka pada hemat saya, sewajibnya para ibu bapa, anggota keluarga dan ahli akademik diberikan penghargaan yang tinggi atas kemuliaan khidmat mereka dalam membimbing graduan sekalian menjadi insan yang berguna.

14. Pada masa yang sama, anda juga memikul kewajipan untuk menjadi warganegara yang patriotik dan bertanggungjawab penuh atas untung nasib dan masa depan negara tercinta ini. Tanggungjawab ini termasuklah melunaskan pinjaman pengajian anda kepada pihak penaja dan pembiaya secara konsisten.

15. Dengan pengalaman kampus yang telah ditimba sepanjang pengajian di sini, tibalah juga masanya untuk graduan sekalian menjadi anggota masyarakat yang mampu menyumbang manfaat dan memberi khidmat.
16. Kini, sebagai insan terpelajar dan sebahagian besarnya telah pun berkerjaya, maka ruang tanggungjawab dan peluang berbakti untuk anda semakin luas. Maka, perhatikanlah rasa syukur atas kejayaan ini dengan menjadi rakyat yang berintegriti tinggi dengan keupayaan untuk berkhidmat sebagai jurubicara masyarakat yang bertanggungjawab.
17. Inisiatif *MyGift* yang telah dilancarkan secara rasmi oleh UMP pada 1 Oktober 2016 yang lalu merupakan antara ruang yang disediakan untuk anda sekalian kembali menyumbang kepada Universiti ini dengan amal dan sedekah jariah melalui sepuluh dana yang diwujudkan di bawah inisiatif tersebut.

18. Inisiatif ini bukan sahaja mensasarkan anda sebagai penyumbang, tetapi juga organisasi yang menjadi majikan anda untuk turut serta dalam usaha meningkatkan kualiti pendidikan dan kesejahteraan mahasiswa melalui instrumen endowmen dan wakaf.

### **MAKLUMAN AM MAJLIS KONVOKESYEN KE-11**

### **DAN IKLIM SEMASA AKADEMIK**

19. Tuan-tuan dan puan-puan;

Sejak Majlis Konvokesyennya yang pertama pada tahun 2006, UMP sehingga kini telah menghasilkan seramai 16,725 orang graduan dalam pelbagai bidang dan peringkat pengajian.



20. Untuk Majlis Konvokesyen Ke-11 ini, seramai 2,465 orang graduan menerima ijazah dan diploma masing-masing. Daripada jumlah tersebut, seramai 43 orang merupakan graduan Doktor Falsafah, 144 orang graduan Sarjana, 54 graduan Sarjana Eksekutif, 1,615 orang graduan Sarjana Muda dan 321 orang graduan Diploma.
  
21. Majlis Konvokesyen Ke-11 ini turut mengabadikan pengiktirafan kepada dua orang tokoh melalui pengurniaan Ijazah Kehormat iaitu Yang Berbahagia Datuk Aminar Rashid Salleh iaitu Presiden dan Ketua Pegawai Eksekutif Perusahaan Otomobil Kedua Sdn Bhd (PERODUA) yang menerima Ijazah Kehormat Doktor Falsafah (Kejuruteraan Automotif) dan Profesor Dr. Karl-Heinz Meisel iaitu Presiden Karlsruhe University of Applied Sciences di Jerman yang menerima Ijazah Kehormat Doktor Falsafah (Kejuruteraan Mekatronik).

22. Sejalan dengan Pelan Strategik UMP 2016-2020 yang kini sedang dilaksanakan, UMP komited untuk terus memartabatkan jenamanya ke arah menjadi sebuah universiti teknologi terunggul melalui inisiatif kualiti dari segi pembangunan intelek dan relevan industri serta masyarakat.
  
23. Selain inisiatif pengantarabangsaan sistem pendidikan dan kurikulum sebagaimana yang dilakukan oleh UMP dengan rakan kerjasama akademiknya di negara Jerman iaitu Karlsruhe Universiti of Applied Sciences dan Reutlingen University melalui penawaran program dwijjazah di peringkat Sarjana Muda, kecemerlangan Universiti ini turut bergantung kepada kualiti bakat insan yang dimilikinya.
  
24. Justeru, adalah menjadi keutamaan pihak pengurusan untuk melaksanakan inisiatif strategik secara berterusan untuk meningkatkan prestasi perkhidmatan 1,771 warga kerja dan pencapaian akademik 10,576 warga mahasiswanya yang terdiri daripada 9,293 orang prasiswazah dan 1,283 orang pasca siswazahnya.

25. Bagi memastikan kualiti pendidikan yang terbaik untuk para mahasiswa, maka tumpuan khusus diberikan kepada pengambilan tenaga pensyarah yang berkualiti dan berkepakaran.
26. Justeru, daripada keseluruhan 642 staf akademik, seramai 65.6% atau 421 orang memiliki kelayakan PhD dan 25% atau 160 orang dari kalangan mereka mempunyai pengalaman industri sekurang-kurangnya lima tahun.
27. Kelebihan ini membolehkan para mahasiswa mengikuti pengajian dengan pendedahan teori dan praktikal yang seimbang, sekaligus menyediakan mereka sebagai graduan yang kompeten dan kompetitif.

28. Walaupun berdepan dengan realiti ekonomi global yang mencabar kini, namun pihak pengurusan tetap komited untuk memastikan kadar Kebolehpasaran Graduan (Graduate Employability) Universiti ini berada pada tahap yang positif melalui pengelolaan pelbagai inisiatif yang bernilai tambah kepada kualiti dan daya saing mahasiswa UMP sebelum mereka menamatkan pengajian.

### **KATA PENUTUP DAN LAFAZ PENGISYTIHARAN ALUMNI**

28. Tuan-tuan, puan-puan dan para graduan yang dikasihi,

Penganugerahan diploma kepada para graduan sebentar tadi menandakan pula satu ikatan baharu, iaitu antara anda sebagai alumni dengan UMP sebagai *alma mater*. Oleh itu, UMP menanti sumbangan khidmat anda dalam apa jua bentuk selepas ini sebagai alumni yang berbudi.

29. Justeru, sukalah saya menyarankan kepada graduan sekalian untuk tidak melupakan asal-usul anda. Berbanggalah bahawa anda pernah menuntut di UMP. Kekalkanlah hubungan yang rapat dengan bekas pensyarah dan fakulti masing-masing bagi menentukan bentuk-bentuk khidmat sukarela dan inisiatif konstruktif yang dapat disalurkan bagi manfaat Universiti ini dan *juniors* anda selepas ini.

30. Dengan restu ibu bapa dan keluarga serta barakah ilmu dari para guru dan pensyarah, saya berdoa ke hadrat Allah Ta'ala mudah-mudahan graduan sekalian akan menjalani hidup yang penuh keberkatan sebagai anak yang soleh dan solehah serta warganegara yang tahu bersyukur dan membalas budi.

31. Memandangkan Sesi Kelima ini merupakan sesi terakhir bagi Majlis Konvokesyen Ke-11, maka sukalah saya mengambil peluang untuk merakamkan setinggi-tinggi ucapan terima kasih dan penghargaan kepada semua pihak yang telah bertungkus-lumus bekerja dan berkhidmat dalam apa juga peranan dan kapasiti bagi memastikan kelancaran pelaksanaan edisi konvokesyen kali ini sejak 19 November 2016 yang lalu.
  
32. Ini termasuklah juga sumbangan bakat oleh para penyanyi dan pemuzik yang telah berusaha untuk menceriakan suasana dan menghiburkan para tetamu sepanjang kelima-lima sesi Majlis Konvokesyen Ke-11 ini dengan persembahan mereka.
  
33. Saya juga mendoakan agar universiti, negeri dan negara ini terus dilimpahkan rahmat peliharaan Allah Ta'ala pada setiap masa dengan naungan keselamatan, kesejahteraan dan keberkatan, *Amin Ya Rabbal 'Alamin*.

34. Mengakhiri ucapan, saya dengan sukacitanya mengisytiharkan bahawa semua 325 graduan dalam Sesi Kelima, Majlis Konvokesyen Ke-11 pada pagi ini secara rasminya kini bergelar Alumni Universiti Malaysia Pahang.

Sekian, *Wabillahi taufiq walhidayah,*

*wassalamualaikum warahmatullahi wabarakatuh.*